

## Inatsisissatut siunnersuummut oqaaseqaatit

**Oqaaseqaatit nalinginnaasut**1. Inatsisissatut siunnersuutip tunuliaqutaa

Inuit biiliisa biilillu assartuutit innaallagissamik brintimilluunniit ingerlatillit eqqunneqarneranni nioqputissanik eqqussuinermit akitsuummik aamma qamutit motorillit akileraarutaannik akiliisitsinngikkallarnissamik inatsisissatut siunnersuut Inatsisartut 2010-mi akuersissuti-gaat, tassa ukuni sisamani piffissami 1. januar 2010-miit 1. januar 2014-imut biilinut taamaat-tunut eqqussuinermit akitsuummik qamutillu motorillit akileraarutaannik akiliisoqassanani.

Kalaallit Nunaanni CO<sub>2</sub>-mik aniatitsinermik annikillisaanissap kajumissaarutiginnissaa periar-fissagissaartinneqarnissaalu taama siunnersuuteqarnerup siunertarisimavaa.

Angallannerup tungaatigut ineriartitsineq ukiuni kingullerni sukkatsissimaqaaq, ingerlatissa-tullu atorneqarsinnaasut assigiinngitsut teknikkikkut ineriartortitsinerup nassatarisaanik ullu-mikkut periarfissaaleriartorput. Tassa brintimik sanaartorerup, brintillu angallannermut atu-gaanerata iluanni nunarsuarmi tamarmi ineriartorerujussuaqarsimavoq. Taamaakkaluartorli teknologi sorleq siunissami nunani tamani angallatigineqartussanut atussallugu pitsaaner-paa-jussanersoq maannamut suli erseqqissumik paasinarsisimanngilaq. Taamaammatt Kalaallit Nunaannut tunngatillugu teknologiimik aalajangersimaqqissaartumik atuiniarnissaq aningaa-saliissuteqarnerliornermik kinguneqarsinnaavoq.

Tamanna pillugu siunnersuutigineqarpoq inuit biilii biilillu assartuutit innaallagissamik brinti-milluunniit ingerlatillit eqqunneqarneranni nioqputissanik eqqussuinermit akitsuummik aam-ma qamutit motorillit akileraarutaannik akiliisitsinngikkallarnissaq 1. januar 2018-ip tungaa-nut sivitsorneqassasoq. Akiliisitsinngikkallarnissaq aamma lastbiilinut, bussinut il.il atuup-poq, bussinullu aalajangersimasumik ingerlaarfilinnut naleqquttuulluorsorinarluni.

2. Siunnersuutip imarisai pingaarnertit

Inatsisissatut siunnersuutip kingunerissavaa inuit biiliisa biilillu assartuutit, kiisalu nutaatut lastbiilit bussillu taamaallaat innaallagissamik brintimillu ingerlatillit eqqunneqarneranni ni-oqputissanik eqqussuinermit akitsuummik aamma qamutit motorillit akileraarutaannik aki-liinngikkallarnissaap ukiunik sisamanik (nutaamik) sivitsorneqarluni, 1. januar 2018-ip tu-ngaanut atuunnissaa.

Akitsuummik akileraarummillu maanna akiliisitsinngikkallarnermik 1. januar 2014-imi ato-runnaartussamik sivitsuinnissaq ingerlatissat allat soqutigineqaleriartorerannut ineriartortinne-

qarnerannullu suli soqutigineqaleriartortunut attuumassuteqartinneqassaaq. Taamaalillutik biilit innaallagissamik ingerlatillit Nuummi illoqarfinnilu anginerni allani biilinu nalinginnaasunut taarsiullugit atorneqarsinnaareerput.

Akiliisitsinngikkallarneq maanna atuuttoq sivitsorneqanngippat biilit innaallagissamik brintimillu ingerlatillit biilinu nalinginnaasunut unammillersinnaarpiarnaviangillat – tassuunakkullu biilit ikummatissanik uuliamit pisunik atuisuunngitsut amerliartorsinnaanerigaluat ajornakusuulissaaq, Kalaallit Nunaata CO2-mik aniatitsinerata tamarmiusup millisinneqarnissaa-nik Naalakkersuisut kissaataannut akerliusumik.

Biilit hybridimik ingerlatillit suli inatsisissatut siunnersuummi pineqartunut ilaangillat.

### 3. Pisortanut aningaasatigut allaffissornikkullu sunniutissai

Akitsuummik akileraarummillu akiliisitsisoqanngikkaluartuq biilit innaallagissamik ingerlatillit taamaallaat 12-it Kalaallit Nunaannut eqqussorneqarsimapput. Biilini brintimik ingerlatilinnik eqqussisoqarsimanngilaq. Taamaammat eqqussuinermi akitsuutini qamutillu motorillit akileraarutaannik, piffissami 1. januar 2018 tikillugu isertitassatigut annaaneqartussat siunnersuutip kingunerisaanik amerlanngitsuinnaassanganneqarput.

Eqqussuinermi akitsuutit maanna atuuttut tassaapput inuit biiliinut akitsuut aalajangersimasoq 50.000 kr.-iusoq, saniatigullu fakturami akiata 50.000 kr.-init annerusup 150.000 kr.-inilli minnerusup 100 procentia, aammalu nalingata sinneruttup 125 procentia, taavalu biilit assartuutit 4 tons ataallugu oqimaassusillit akitsuutaat tassaalluni akitsuut aalajangersimasoq 50.000 kr.-iusoq, saniatigullu fakturami akiata 50.000 kr.-init annerusup 50 procentia. Biilinu assartuutinu 4 tons sinnerlugu oqimaassusilinnut, matumani aamma bussinu, lastbiilinu il.il. akitsuut aalajangersimasoq 50.000 kr.-iuvoq.

Qamutit motorillit akileraarutaat maanna ukiumut ima angissuseqarput:

Qamutit motorillit 1.000 kg.-t tikillugit oqimaassusillit	kr. 6.554
Qamutit motorillit 1.001 kg.-niit 1.200 kg.-t tikillugit oqimaassusillit	kr. 10.049
Qamutit motorillit 1.201 kg.-niit 1.500 kg.-t tikillugit oqimaassusillit	kr. 10.747
Qamutit motorillit 1.501 kg.-niit 1.800 kg.-t tikillugit oqimaassusillit	kr. 15.231
Qamutit motorillit 1.800 kg.-t sinnerlugit	kr. 17.575

Siunnersuut allaffissornikkut annertunerusumik sunniuteqassanganneqanngilaq.

### 4. Inuussutissarsiutini ingerlataqartunut aningaasatigut allaffissornikkullu sunniutissai

Inuussutissarsiutini ingerlataqartut sipaagassaraat biilini innaallagissamik brintimillu ingerlatilinnik eqqussuinermi akitsuut aamma qamutit motorillit akileraarutaat ukiup affakkaartu-

mik akilerneqartartoq. Tassungali taarsiullugu inuussutissarsiutinik ingerlataqartut biilnik taamaattunik pisinnermut aningaasartuutaat, biilit nalinginnaasut taakkununga assingusut akiinut sanilliullugit amerleriassangatinneqarput. Inuussutissarsiutinik ingerlataqartut biilnut innaallagissamik brintimillu ingerlatilinnut ingerlatsinnermut aningaasartuutimikkut sipaaruteqanngaarnissaat naatsorsuutigineqanngilaq.

Siunnersuut inuussutissarsiutinik ingerlataqartunut allaffissornikkut sunniuteqassangatinneqanngilaq.

#### 5. Avatangiisinut, pinngortitamut inuillu peqqissusiannut sunniutissai

Siunnersuut avatangiisinut pinngortitamullu pitsaasunik sunniuteqarsinnaavoq.

Qamutit motorillit innaallagissamik ingerlatillit illoqarfinni erngup nukinga iluaqutigalugu innaallagissiorfeqartuni atugaaleriartornerat avatangiisinut iluaqutaassaaq. Illoqarfinni uulia atorlugu innaallagissiorfeqartuni iluaqutissartaa qularnarpoq.

Biilit innaallagissamik brintimillu ingerlatillit ikittuinnaat maannamut eqqussorneqarsimammata siunnersuutip avatangiisinut pinngortitamullu pitsaasunik sunniutissai annikitsuinnaassangatinneqarput.

#### 6. Innuttaasunut sunniutissai

Innuttaasut biilnik innaallagissamik brintimilluunniit ingerlateqartunik pisisut biilit eqqunneqarneranni akitsuut ataasiarlugu akiligassaaq, kiisalu qamutininut motorilinnut akileraarut ukiup affakkaartumik akilerneqartartoq sipaassavaat. Pisiarineranili akiata biilit nalinginnaasut tassunga assingusut akiannut sanilliullugu qaffasinnerunissaa naatsorsuutigineqarpoq.

Siunnersuut innuttaasunut allaffissornikkut sunniuteqarnaviangilaq.

#### 7. Sunniutissai pingaarutillit allat

Inatsisissatut siunnersuut Naalagaaffeqatigiinnermut sunniuteqassangatinneqanngilaq.

#### 8. Oqartussaasunik aamma soqutigisaqatigiinnik il.il. tusarniaaneq

KANUKOKA, Kalaallit Nunaanni Sulisitsisut Peqatigiiffiat (GA), Nunaqavissut Suliffiutillit Kattuffiat (NUSUKA), Sulinermik Inuussutissarsiuteqartut Kattuffiat (SIK), KPMG Grønland, Deloitte, Grønlands Revisionskontor, Inussutissarsiornermut, Aatsitassaqaqarnermut Sulisoqarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ineqarnermut, Pinngortitamut Avatangiisinullu Naalakkersuisoqarfik.

Tusarniaanermi akissuteqarnissamut piffissaliusseq naammat akissuteqartuusimapput Aali-sarnermut, Piniarnermut Nunalerinermullu Naalakkersuisoqarfik, Ineqarnermut, Pinngortitamut Avatangiisinullu Naalakkersuisoqarfik, SIK kiisalu Kalaallit Nunaanni Sulisitsisut Peqatigiiffiat (GA).

Ineqarnermut, Pinngortitamut Avatangiisinullu Naalakkersuisoqarfiup biilit innaallagissamik ingerlatillit Kalaallit Nunaanni atugaanerulernissaat eqqarsaatigalugu siunnersuut tapersorsorpaa. Naalakkersuisoqarfiulli oqaatigaa biilit innaallagissamik ingerlatillit siunissami immikkoortutut pineqalernissaat naleqquttuussasoq, taakkualu eqquusuinermi akitsuutaat qamutinullu motorilinnut akileraarutaat aallaqqaammut 0 kr.-imik angissusilerneqassasut, tassa biilini innaallagissamik ingerlatilinnik pillit, biilini innaallagissamik ingerlatilinnik pisileramik atugassarititaasut tatigisamik, akiliisitsinngikkallarneq atorunnaarpat atuukkunnaaratarsinnaanerisigut neriorsulussinnarneqartutut misiginnginnissaat pillugu.

*Qamutit motorillit innaallagissamik brintimillu ingerlatillit maanna ineriartortikkiartuaarneqarneranniilli atugaaneruleriartornissaat, biilit innaallagissamik brintimillu ingerlatillit akitsuutaannik akileraarutaannillu akiliisitsinngikkallarnikkut periarfissagissaartinniarneqarpoq, tassuunakkullu aamma Kalaallit Nunaata CO<sub>2</sub>-mik aniatitsineranik tamarmiusumik millisitsissalluni. Akitsuutip biilit Kalaallit Nunaanni atugaaleriartornerat ilutigalugu naapertuunnerusumik angissusinikkiartuaartinneqarnissaa naatsorsuutaavoq.*

*Biilini akitsuusiisarneq taassuma ilutigisaanik allanngartikkiartuaarneqassaaq, qamutit motorillit ataasiakkaat avatangiisinik mingutsitsinerat akitsuusiinermi isiginiarneqassalluni. Taamaattorli biilini akitsuusiisarnerup allanngartinneqarnissaa tamatuminnгалu suliaqarnissaaq allatigut ineriartortitsiniarluni nutarteriniarlunilu sulinissamut piviusunngortitsinissamullu ataqatigiissaarneqassapput.*

Naalakkersuisoqarfiup tusarniaanermut akissummini inassutigaa inatsimmi pineqartut "...inuit biilii biilillu assartuutit" amerlineqassasut; "...qamutit motorillit", taamaaliornikkut bussit lastbiilillu akitsuusiinnginnissami aamma pineqalersillugit.

*Akiliinngikkallartitsineq qamutinut motorilinnut sunulluunniit, eqquusuinermi akitsuutit pillugit Inatsisartut inatsisaat aamma qamutit motorillit akileraarutaat pillugu Inatsisartut inatsisaat naapertorlugit akitsuusigassaasunut tamanut atuuppoq. Tamanna siunnersuummi § 1-imi allaqqavoq.*

*Siunnersuutip qulequtaa siunnersuummi § 1-imut naapertuuttunngorlugu iluarsineqarpoq.*

Aamma biilit brintimik ingerlatillit akitsuutinik akileraarutinillu akiliinngikkallartitsinermi sulii ilaatinneqarnissaat Naalakkersuisoqarfiup apeqquuserpaa, Naalakkersuisoqarfiummi nalilerpaa, avatangiisinut akitsuutit atuutilersinneqarmatali brint ingerlatit atussallugu soqutiginarunnaarsimasoq.

*Biilit brintimik ingerlatillit qamutinut motoorilinnut nalinginnaasunut taartitut atussagaanni qamutit motoorillit imaluunniit qamutit motoorillit ingerlataasa akitsuusigaannginnissaat akitsuusigaanissaalluunniit kisimik apeqqutaasorinangillat. Biilit innaallagissamik brintimillu ingerlatillit atugaaleriartornerannut aalajangiisuunerusorinarput teknologimik ineriartortitsinerit nunarsuarmilu tamarmi atugaaleriartornerat. Aammami avatangiisinut tunngasut eqqarsaatigalugit brintip erngup nukinga assigisaaluunniit atorlugit pilersinneqarnera aamma brintip ikummatissat uuliamit pisut atorlugit pilersinneqarnera immikkoortinneqartariaqassapput. Pilersitseriaaseq kingullertut taaneqartoq avatangiisinut ajoqutaasorujussuuvoq. Qamutit motoorillit brintimik ingerlatillit motoorinut nalinginnaasunut taarsiullugit siunissami atugaasinnaannginnissaat maannangaaq oqaatigineqarsinnaanngilaq.*

*Nunarsuarmi tamarmi brintimik tunisassiornerup iluani aammalu brintip assartuinermi atugaanerani annertuumik pisoqarsimavoq. Taamaammat biilit brintimik ingerlatillit akitsuuummik akileraarummillu akiliinngikkallartiinnarneqarallarnissaat Naalackersuisut pisariaqartuusoraat.*

Naalackersuisoqarfik naggasiilluni siunnersuuteqarpoq qamutit motoorillit innaallagissamik ingerlatillit qamutit motoorillit nalunaarsorneqarfianni nalunaarsugaalissasut, qamutit motoorillit innaallagissamik ingerlatillit Kalaallit Nunaanni qanoq amerlatiginerat taamaaliornikkut malinnaaffigineqarsinnaassammat.

*Qamutinik motoorilinnik nalunaarsuineq Politeeqarfimmi pisarpoq, tassanilu nalunaarsukkat il.il. Akileraartarnermut Aqutsisoqarfimmut nalunaarutigineqartarlutik. Akileraartarnermut Aqutsisoqarfiup akileraarut akiligassiissutigisarpa. Akileraartarnermut Aqutsisoqarfiup akileraarummik naatsorsuinerminut atatillugu qamutit motoorillit ingerlataat pillugu paasisstissanik qamutit motoorillit nalunaarsorneqarfiannut nalunaarsuinissaa akornutissaqarsorinannngilaq.*

Qeqqata Kommuniata akissutaa KANUKOKA-p ilanngussimavaa. Akissummi tassani allaq-qavoq akiliinngikkallartitsinissamik sivitsuinissaq Qeqqata Kommuniata isumaqatiginartikkaa, tamannami Qeqqata Kommuniata piujuartitsinissaq siunertaralugu suliniutaanut naapertuulluarmat.

Qeqqata Kommuniata siunnersuutigaa inatsisissatut siunnersuut innaallagissap akiisa allanngorartuulernissaannik malitseqartinneqassasoq, unnuaaneranimi innaallagissamik immiinis-saq soqutiginarnerussammat. Aammattaaq siunnersuutigineqarpoq Namminersorlutik Oqartussat ingerlatsivii suliffeqarfiutaallu illoqarfinni erngup nukinga atorlugu innaallagissiorfe-qartuni biilinik innaallagissamik brintimillu ingerlatilinnik pisaassasut, biilit taamaattut biililerivinni pitsaanerusumik passunneqartarnissaat siunertaralugu naleqqussusiinik misilittaallu-tillu nalilersuissammata.

*Qeqqata Kommuniata siunnersuutaa inatsisissatut siunnersuummut uungarpiaq attuumassuteqanngilaq. Taamaammatt taanna oqaaseqarfigineqanngilaq.*

Aalisarnermut, Piniarnermut Nunalerinermullu Naalakkersuisoqarfik, SIK aamma Kalaallit Nunaanni Sulisitsisut Peqatigiiffiat siunnersuummut oqaaseqaatissaqanngillat.

## **Aalajangersakkanut ataasiakkaanut oqaaseqaatit**

### *§ 1, nr. 1-imut*

Siunnersuutigineqarpoq biilit innaallagissamik brintimilluunniit ingerlatillit eqqunneqarnerani nioqqutissanik eqqussuinermi akitsuummik aamma qamutit motorillit akileraarutaannik akiliisitsinngikkallarnissaq ukiuni sisamani 1. januar 2014-imiit 1. januar 2018-ip tungaanut atuuttussamik sivitsorneqassasoq.

Aalajangersakkami taamaallaat pineqarput biilit innaallagiaannarmik brintiinnarmillu ingerlatilinnik taaneqartartut. Biilit innaallagissamik ingerlatillit, ingerlatit allat atornagit batterimik immertakkamik piligaapput. Biilnut brintimik ingerlatilinnut tunngatillugu brinti ingerlataat tassaasinnaavoq erngup silaannaallu avisaartinnerisigut elektrolysiliornikkut pilersinneqarpoq. Tassuunakkut brinti CO<sub>2</sub>-mik aniatitsineq ajorpoq.

Biilit ingerlatissanik allanik sunilluunniit atortulerneqarsinnaanermut sukkulluunniit piareersagaasimassanngillat. Tassuunakkut qulakkearniarneqarput siunnersuutip CO<sub>2</sub>-mik aniatitsinermik millisaaqataaniarnermik siunertamik malinninnissaa, misilittakkanillu siunissami biilit tungaasigut akitsuuteqartitsinermut tunngaviusinnaasunik katersinissaq.

### *§ 2-mut*

Inatsisartut inatsisaata 1. januar 2014-imi atortuulernissaa, aammalu 1. januar 2018-imi ingerlaannartumik atorunnaarnissaa siunnersuutaapput.

Inatsit sivitsorneqassanersoq, piffissalluunniit qaangiunnerata kingorna arlaatigut akitsuusii-soqassanersoq ulloq taanna nallertinnagu nalilerneqarumaarpoq.